



Nuuk 22. oktober 2018

UKA2018/50

UKA2018/79

Pele Broberg Partii Naleraq

**Imm. 50 Aningaasarsiaqartitaaneqi pillugu inatsisip
ilaasortaajunnaarnersiutisiaqartarnermut malittarisassartaasa allanngortinnissaannut
siunnersuuteqaqqullugit Naalakkersuisut peqquneqarnissaanik Inatsisartut
aalajangiiffigisassaattut siunnersuut, taamaasilluni ilaasortaajunnaarnersiutisiaqarnerup
nalaani akissarsiat tamarluinnaasa ilaasortaajunnaarnersiutisianit
ilanngaatigineqarsinnaanngorlugit**

(Inatsisartunut ilaasortaq Niels Thomsen, Demokraatit)

aamma

**Imm. 79 Kingusinnerpaamik UKA 2019-mi aningaasarsiaqartitaanermut inatsisip
allanngortinnissaanut siunnersuusioqquellugit Naalakkersuisut peqquneqarnissaanik
Inatsisartut aalajangiiffigisassaattut siunnersuut, tassani aalajangersarneqassalluni,
Inatsisartunut ilaasortat Folketingimi ilaasortasut imaluunniit aamma
kommunalbestyrelsimi ilaasortasut aningaasarsiaat apparinneqartassasut tassani
atorfimmik aappaani aningaasarsiaasa amerlaqataannik aamma taamannak
ilanngaassisooqartassasoq borgmesteritut, borgmesterilluunniit tullersortaatut atorfik
eqqarsaatigalugu.**

Inatsit atortussanngortinneqassaaq tulliani Inatsisartunut qinersisoqarneraniit.

(Inatsisartunut Ilasortaq Tillie Martinussen, Suleqatigiissitsisut)

Siullermeernera

Immikkoortut marluk aalajangiiffigisassatut siunnersuutit Partii Naleraq naatsumik oqaasertalerusuppa.

Immikkoortoq 50

Annanniutaaneq pisariaqartitsisunut aaqqiivigineq oqallisissiami oqariartuutaavoq. Suliffissaarunnissaanut sillimasiineq oqariartuummi aamma ilaalluni.

Partii Naleqqami tapersiilluta, allatukanneq oqaasertalerusupparput.

Naalakkersuisuuneq Inatsisartuunerlu inuiaqatigiinnut sulissinertut inisseqqasoq, ajuusaarnarpoq annanniusersortariaqarnera.

Sooruna Partiit ilaat sinnerlugu inuiaqatigiit sullikkumallugit, kingorna qinikkat suliffissaarunnissaanut sillimmasertariaqarivut?

Oqartuarpugut inuuusuttatsinnut: "Ilinniaritsi. Suliniaritsi."

Kingornalu ilinniareerlutik inuiaqatigiillu akornani sulereerunik, nunartik sullikkusullugu qinerneqarunik sillimmasertariaqarlutik.

Ilumoorpoq qinikkat ilaat suliffissaaruttartut qinigaareernerup kingorna. Taakkulu qulakkeernissaat apeqqusernagit oqallisigineqartumi isummernissaq nuannaarutigaarput Partii Naleqqami.

Taamatut oqaasertalerlugu tamakkiisumik Partii Naleqqamiit siunnersuutigineqartoq taperserparput.

Immikkoortoq 79

Partii Naleqqamiit marloqiusamik isertitaqarneq aamma naatsumik oqaasertalerusupparput.

Qinikkatut invertinneqarneq, inatsisartuniugaluarpat imaluunniit folketingimi, tunngaviusumik qinersisartut aaliangertarpaat.

Partiit iluminni kiffaanngissuseqarlutik isummersinnaapput, soorlu ataatsimeersuarnermi piumasaralugu marloqiusamik isertitaqarneq akuerinagu. Partii suugaluarpalluunniit taanna kiffaanngissuseq uagut Partii Naleqqamiit akuleruffigerusunngilarput.

Inuiaqatigiit ikittunnguulluta, soorlulu immikkoortoq 50-imqi eqqartorneqartoq, suliffittaarsinnaannginnermik kinguneqarsinnaanera aamma ernumanarsinnaanera Partii Naleqqamit paasivarput.

Kisianni inuiaqatigiinni qinikkat, sumi qinigaanerat najoqqutaralugu, inatsisinik sukaterinissaq tapersinngilarput.

Qanorluunniit isumalluartigaluni siunnersuutaagaluarpat, partiit kiffaanngissuseqarlutik ilaasortaminnut killileerusussinnaannerat imaluunniit killileerusunnginnerat inatsisitigut akuleruffiginissaq orniginartinngilarput.

Qinersisartut tatigisatik qinertarniarlissuk, taava qinikkap nammineq nalilersinnaavaa inatsisaareersut iluanni, qanoq qinersisini pitsaanerpaaamik sullissinnaanerlugit.

Taamatut oqaasertaqartillugu Partii Naleqqamiit siunnersuut itigartipparput, amerlanerussutilli ataatsimiititaliami suliassanngortikkusukkunikku ataqqillugu.